

## مقحم محمد النجدي

الشيخ مقحم محمد بن فالح النجدي من الصقور من عنزة، شاعر - وغزير المعاني له عدة قصائد اخترنا منها التي لقبها ابن رشيد الشيخة :

ياالله ياالمطلوب ياوال الاقدار  
انت الذي مدات جودك لطيفه

يا الله ياالمعبود عاون هل الكار  
وتحل شدات عليهم كلليفة

اللي مجالسهم بها بن وهار  
ونجر توالي الليل تسمع رجيفه

مكارم للضيف عجلات وبكار  
ومفطحات في صحون نظيفة

يامزنة غرا من الموسم مبدار  
اللي جذبنا من بعيدا رفيفه

تمطر من الهدري لياخشم سنار  
تروى فياض محقبة والحتيفة

وتضفي على كل القفاري والأقطار  
وتصبح بها خدان ربعى مريفه

بعد الحيا فاحت بها ريح الأزهار  
تخالف النوار مثل القطيفة

ترعابها العرى وتبني لها طار  
عقب الضعف راحت ردوم منيفة

واذوادنا ما يرتعن دمنه الدار  
الا هكا الفياض الصحاح النضيفة

يرعن بجبر وعبدالله وجبار  
خيالة يوم الملاقي عنيفة

وقطعاننا يرعن بناسر واجهار  
من دونهن نروي الغلب والرهيفة

وحنا فريق مانغبي سنا النار  
عدونا لوه بعيد نخيفة

ودار بها الحقران ماهي لنا دار  
وش عاد لو كانت ربيع مريفه

ماهي حكايا مسرد عقب مانار  
اللي هرب واطراف رجه نظيفة

ان سوهجوا عنها قليلين الأبصار  
من دونها نروي السيوف الرهيفة

الصبر مفتاح الفرج هو والأفكار  
ومن لاصبر تصبح احواله كسيفه

خطو الولد مثل البليهي لياتار  
زود على حمله نقل حمل أليفه

وخطو الولد ينشي على موتت النار  
صفر على عود تظبه كتيفه

وخطو الولد مثل النداي ليا طار  
صيده من الجزلات ماهي ضعيفة

وخطو الولد مايسوى ربع دينار  
مع العرب يشبه لخطو الهديفة

وخطو الولد يامال قصاف الأعمار  
لانافع نفسه ولا منه خيفه

وحنا كما المشخص عن الصرف مابار  
بالوزن يرجح والمصارى خفيفة

الا ومع ذلك لك الله لنا كار  
عن جازنا ماقط نخفي الطريفة

ونرفا خمال الجار لو هو بعد بار  
نضحك حجاجه بالعلوم اللطيفة

نرفا خماله رفيه العش بالفار  
ونودع له النفس القوية ضعيفة

ولا نبدي الخافي ليا صارما صار  
نفرح قصر البيت لوبان حيفه

أحد على جاره بختري ونوار  
واحد على جاره صفاه محيفه

الجار لابده مقفى عن الجار  
كل بجيرانه يعد الوصيفة

ومكرم اسبال الضيف حق وتعبار  
لا من ولد العفن شح برغيفه

لابدها ترجع تواريخ واذكار  
وتبقى لدسمين الشوارب وظيفة

صلاة ربي عداد ماخضر الأشجار  
على النبي له الشريعة نظيفة

